

Hitimisho la Kazi Yake

Bwana, Mungu mwingi wa huruma, mwenye fadhili, si mwepesi wa hasira, mwingi wa rehema na kweli; mwenye kuwaonea huruma watu elfu elfu, mwenye kusamehe uovu na makosa na dhambi; wala si mwenye kumbesabia mtu mwovu kuwa hana hatia kamwe—

Kutoka 34:6, 7.

Wale wanaompokea Yesu kwa imani wataangaliwa na Mbingu kama lulu za thamani ambazo mfanya biashara alizilipia gharama isiyopimika, na mawakala wa kibinadamu ambao wanampata Yesu watatambua kwamba wamepata hazina ya mbinguni. Watakuwa na shauku ya kuuza vyote walivyo navyo ili kulinunua shamba lililo na hazina hii. Wanapotafakari kwa kina upendo wa Mungu, mpango wa wokovu unapofunguliwa katika fikra zao, kadiri siri ya kujishusha hadhi kwa Kristo inavyokuwa wazi zaidi kwao, kadiri wanavyoona kafara ambayo ilitolewa kwa ajili yao, hawahesabu chochote kuwa bora kiasi cha kushindwa kuachana nacho kwa ajili Yake....

Bwana Mungu wa mbinguni alikusanya utajiri wote wa ulimwengu, na kuuweka chini ili kununua lulu ya wanadamu waliopotea. Baba aliweka mikononi mwa Yesu rasilimali Zake zote za mbinguni ili kwamba baraka tele za mbinguni ziweze kumwagwa juu ya jamii iliyoanguka. Mungu asingeonesha upendo mkuu mno kuliko Alivyoonesha katika kumtoa Mwanawe Mpendwa kwa ulimwengu huu. Zawadi hii ilitolewa kwa mwanadamu ili kumthibitishia kwamba Mungu hakuacha kitu kisichoweza kufanywa ambacho Angeweza kukifanya, kwamba hakuna kilichobakishwa, bali kwamba mbingu yote imemiminwa katika zawadi moja iliyo kuu. Furaha ya sasa na ya milele ya mwanadamu inapatikana katika kuupokea upendo wa Mungu, na katika kutunza amri za Mungu. Yesu ni Mkombozi wetu. Yeye ni Neno ambaye alifanyika mwili na akakaa kwetu. Ni chemchemi ambayo ndani yake tunaweza kuoshwa na kusafishwa kutoka kwenye unajisi wote.

Yeye ni kafara ya gharama kubwa ambayo imetolewa kwa ajili ya upatanisho wa mwanadamu. Ulimwengu wa mbinguni, ulimwengu usio asi, ulimwengu ulioanguka, na Shetani na jeshi lake hawawezi kusema kwamba Mungu angefanya zaidi kwa ajili ya wokovu wa mwanadamu kuliko Alivyokwisha kufanya. Kamwe zawadi Aliyotoa haiwezi kuzidiwa kiwango, kamwe hawezi kuonesha kina cha upendo zaidi ya huo. Kalvari huonesha hitimisho la kazi Yake.

Ni nafasi ya mwanadamu kuitikia upendo Wake mkuu, kwa kuupokea wokovu mkuu ambao baraka za Bwana zimefanya kuwa rahisi kwa mwanadamu kuupata. Tunalazimika kuonesha ukubali wetu wa zawadi ya Mungu ya pekee kwa kuwa washirika na asili ya Mungu, tukiwa tumeepuka upotovu ulioko ulimwenguni kwa njia ya tamaa. Tunalazimika kuonesha shukrani zetu kwa Mungu kwa kuwa watendakazi pamoja na Yesu Kristo, kwa kuiwakilisha tabia Yake kwa ulimwengu.... Bwana anazitazama roho kama lulu za thamani....

Wanapomwinua Yesu, macho yao yanapakwa mafuta ili kwamba yaweze kupambanua uhusiano wa Yesu kwa familia ya wanadamu. Wanakuwa wenye hekima, na kwa upole na unyenyekevu, fursa inapotokea, wanawakilishwa kwa nafsi zilizopimwa na kujaribiwa ukweli adhimu wa neema ya Mungu iokoayo

(Youth's Instructor, Oktoba 17, 1895).